



國雅卷之三

勾吳顧起綸玄言選

姚恭靖

名廣孝法名道衍吳郡相城人永樂中官太子少師贈榮國公并諡有逃虛集

送友人之松江得曙字

潮來沙磧平月落海門曙汀蒲轉風葉堤柳搖烟絮江  
頭春可憐天涯人獨去有歌送君行無酒留君住雪浪  
沒沙鷗雲帆出江樹回首讀書聲青山不知處

蠡口夜歸

日沒渡口昏水風着人熱漁燈帶螢火微光互明滅舟  
人報水程路遠行欲歇故山不分明目盡心力絕遙想

山中人待人仍待月

鳴琴礪

礪上松瑟瑟礪下水涓涓  
山人來礪阿宴坐拂冰絃  
松風共流水一奏一泠然

題觀音巖

高閣凌虛如履地長江萬里來無際  
世人可到不可留只許禪僧深夏住  
亂帆來往逐雲飛隔岸淮山擁翠微  
大士巖間常宴坐一燈夜照客船歸

題張山人適樂園林館二首

巷僻無車馬閑扉掩薜蘿  
籠馴傳信鶴池畜換書鵝開

逕曾妨竹移梁欲避荷子雲偏好古  
載酒屢相過開牖依林樾迢迢去市遙  
翠低承雨竹綠碎受風蕉夕嶺還侵戶  
春流欲斷橋主人緣愛客時爲出山瓢

秋日重遊穹窿山海雲精舍

迢遶青村外崎嶇紫邏間  
過林才見日到渡不逢山  
一室依巖險雙扉傍竹閑  
曾看雲際鶴向暮獨飛還

登惠山觀泉

古寺連西郭尋泉步礪苔爲憐僧獨迓  
因喜客重來晴鳥臨流集秋花夾岸開  
盤桓須盡興隨處有茶杯

題平坡寺

平坡杳杳挹西湖徑斷樵行敗葉鋪泉落石河深愈急  
雲歸沙樹遠疑無夜堂風靜紆帷幔曉井霜寒響輓轡  
那得餘生辭世網捲衣來此日跣趺

寄虎丘蟾書記

聞道蟾公似贊公一瓶一鉢寄山中雲封蘿屋長疑雨  
泉響松巖半是風履破只緣行脚久囊空非爲作詩窮  
遙思短簿祠前夜共聽寒鐘出磻東

鷄鳴歌

金壺漏殘霜滿屋鷄鳴喈喈烏尚宿征夫纔起促行裝  
馬爲駕鞍車整轂鷄罷俄聞鼓角悲別婦出門雙淚垂

婦牽夫袂話歸日願學鷄鳴不失時

洛陽陌

垂楊散微曉流鶯來早春相逢騎馬客半是看花人華  
屋縈膏馥青樓揚綺塵緱山一回首荒陵臥石麟

轉應詞二首

新柳新柳掩映溪頭渡口長條未絆遊人正是江南早  
春春早春早風雨獨行古道

斜日斜日門外馬蹄聲疾林栖鳥盡飛還霞彩紅銜遠  
山山遠山遠莫怪行人歸晚

楊白花

楊白花雪同色最是無情況無力西蕩東飄意難必斷  
送春光何太疾薄暮和烟點綠漪化作浮萍自不知願  
托春風回故處爲伊吹入深宮樹

### 公莫舞

公莫舞公莫舞沛公倜儻真英主隆準龍顏絕代無三  
尺清霜奮神武天命有在成大功况爾良平作臣輔區  
區范增何足取嗔目起來撞玉斗世稱人傑未爲公我  
謂不及王陵母豈似當年屠狗人怒髮裂眦氣欲伸彘  
肩斗酒快意啖但知有主忘其身公莫舞公莫舞項王  
卽日爲亡虜秦璽來歸萬國朝六合之中皆漢土

### 壯士吟二首

一劍重千金曾將托生死不知燕趙問何人是知己  
相見便知心時聞擊筑吟懷恩在一飯不用酒杯深

曾少詹

名榮字子啓永豐人永樂初及第官  
少詹事兼翰林侍讀學士有巢睫集

### 酒壚行

東家酒壚大道中百尺酒旗垂裊風少年兩姬何窈窕  
當壚一笑顏花紅道傍遇者頻回首駐馬停車更呼酒  
壚頭酒薄渾不知笑勸相歡坐來久西家酒壚相向開  
雕盤綺饌連金壘門前寂寞少行迹堦面夜雨生青苔  
由來酒徒多重色愛此紅顏在壚側暫時過眼寧盡歡

囊中有錢應不惜誰將此意報兩隣坐中無客且莫嗔  
東隣兩姬一朝去門前亦無呼酒人

行路難

繡簾窄地蘭房深猩紅蜀錦芙蓉衾翠鬟二九腰肢小  
楊柳嬌春時娟娟羽林少年輕薄兒相逢盡道歡娛少  
華觴半酣滅紅燭合歡寶帳連環玉楚雨巫雲夢未闌  
水咽銅虬漏聲促凋弓白羽誰家郎射鴨忽中雙鴛鴦  
錦翎繡臆半摧落顧影含淒空自傷只言比翼成歡侶  
中道分飛却愁苦從此飄零失故棲寂寞銀塘鎖烟雨  
君不見東家女兒嫁夫婿寶鏡雙鸞照珠翠畫得蛾眉

八字新朝朝暮暮不相棄

燉煌曲

吐蕃健兒面如赭走入河湟放胡馬七關蕭索少人行  
白骨戰場縱復橫燉煌將士抱戈泣四方胡笳聲轉急  
烽煙斷絕鳥不飛十一年來不解圍傳檄長安終不到  
借兵回紇何曾歸愁雲慘澹連荒漠捲地北風吹雪落  
將軍錦韉暮還控壯士鐵衣夜猶著城中疋綬換斗麥  
決戰寧甘死鋒鏑一朝胡虜忽登城城上蕭蕭羌笛聲  
當時左衽從胡俗至今藏得漢衣服年年寒食憶中原  
還著衣冠望鄉哭老身幸存衣在篋官軍幾時持獻捷

龍支行

龍支城頭暮吹角黃雲蔽天沙草薄虎髯使者長安來  
持麾擁蓋邊塞開城門盡是胡兵守城外老人多白首  
拜迎使者雙淚流問云天子今安否自言世家豐州住  
少小辭家隸軍戍吐蕃昨日犯蕭關胡騎長驅涇隴間  
將軍戰敗鼓聲絕棄戈遺鏃填丘山自從陷沒身爲虜  
五十年來在邊土依棲部落作蕃人生長兒童盡胡語  
朝看烽火望中原夜聽鳴笳思故園頽垣破屋誰家宅  
斷磧荒谿何處村奉使還時報天子蚤遣官軍復清水  
假令老身歸卽死已免遊魂作胡鬼

蓮花燈次胡庶子韻

絳蠟爭燒夜景新芙蓉何事獨先春恍疑金炬初歸院  
不借清漣已絕塵光映若耶溪上女影隨太華井頭人  
若教真可浮波去太乙乘舟便脫巾

訪竺臺琇上人故居

琇師歿後已經年古殿陰廊亦悄然西去竺天還不遠  
南來衣鉢竟誰傳風旛不動空中影塵榻曾遜醉裏禪  
歸客豈堪愁絕處西風黃葉寺門前

海子橋

鯨海遙通一水長滄波深處石爲梁平鋪碧甃連馳道

倒瀉銀河入苑牆  
晴綠乍添垂柳色  
春流時泛落花香  
微茫迴隔蓬萊島  
不放飛塵入建章

得周編修書兼柬兩京諸同年

別離易久覺情踈  
旅舍幽閒嘆索居  
遠客每勞千里夢  
故人初寄一行書  
滿城山色晴雲外  
近海潮聲過雨餘  
禁裏昔年同學者  
班揚文字竟何如

元夕午門觀燈侍宴和鄒侍講韻

宮筵合樂戲魚龍  
此夕承恩在禁中  
鰲戴神山來絳闕  
鸞隨仙馭下瑤宮  
星河影轉千門曙  
羅綺光搖萬燭紅  
願奉宸遊歌在鎬  
長陪歡宴樂無窮

項羽廟

百戰休論蓋世功  
鴻門宴罷霸圖空  
虞歌慷慨孤燈下  
楚業銷沉一炬中  
露濕古墻秋蘚碧  
霜含老樹夕陽紅  
英魂若到彭城路  
忍聽高臺唱大風

送彭巡檢子韶赴關清兼示光澤舍弟

送君南去片帆歸  
五月薰風白紵衣  
路遶閩山征騎遠  
月明蠻徼邏兵稀  
枕榔綠暗經殘雨  
荔子紅垂映落暉  
小弟杉關煩寄語  
客心長伴鵲鴿飛

冬日扈從獵龍山同遊牛首山佛窟寺和胡學士  
數聲清磬遠微微  
始覺塵踪到此稀  
僧向定時聞葉落



客從坐處見雲歸佛居華藏那營窟心會真乘卽悟機  
賜得宮袍新製錦未應還羨五銖衣

蟬

性潔應知飲露清翠綃爲翼蛻來輕高槐殘雨淒清韻  
踈柳斜陽斷續聲逐髻巧添歌女媚製冠偏助上公榮  
長吟不獨能驚夢更恐秋來動旅情

送陳郎中重使西域二首

雕輪華轂擁鳴騶幾欲停鞭記舊遊赤嶺晚雲連雪積  
黃河春水帶冰流旌麾行處羅諸部金帛頒時列衆酋  
却笑虎頭班定遠身親百戰覓封侯

重宣 恩詔向窮邊蕃落依稀似昔年酋長拜迎張繡  
幌羗姬歌舞散金錢葡萄夜醉氍毹月騾裘晨嘶苜蓿  
烟百寶嵌刀珠飾靶部人知是漢張騫

卽事

片片飛花逐水流傷春何處最多愁紅粧獨倚闌干上  
望盡征帆不下樓

楊文貞

名寓字士奇號東里廬陵人永樂間官少師  
無華蓋殿大學士諡文貞有東里先生集

巫山高

巫山高高十二峯連崖疊巘如游龍當時陽臺下神女  
翠斂紅銷空處所朝朝峽裏望氛氲可憐猶似作行雲

國雅卷三  
八  
相思已下露裳淚况復猿聲不可聞

高郵

四顧無山色蒼茫極遠天水雲涵郡部秔稻被湖田草  
舍津頭市菱歌柳外船羈愁念前路非爲別離牽

野亭

秋日野亭上四望盡青山飛鳥去無極白雲相與還

七夕送丁侃吳江教諭

玉露下青冥銀河會兩星故人當遠別獨掉下前汀曉  
月滄洲詠秋風泗上亭芰荷香欲過楊柳翠將零小邑  
連吳郡青山滿洞庭官居自有適况乃坐譚經

題鄂渚贈別圖送人歸廬陵二首

鷓鴣江中紅樹鳳凰城裏青山借問來遊幾日秋水蘭  
舟獨還

客遊黃鶴磯畔家住金魚浦前心似波間明月隨君直  
到螺川

三十六灣

湘陰縣南江水斜春來兩岸無人家深林日午鳥啼歇  
開遍蒲山紅白花

胡祭酒

名儼字若思號願菴南昌人永樂間官  
太子賓客國子祭酒兼翰林院侍讀

遠將歸

去年與郎別楊花飛白雪今年候郎歸楊柳綠依依聞  
郎買船下湘渚日日門前望行人過盡乳鴉啼徘徊  
日暮空延佇攬衣回洞房對鏡下新妝那知清漏短  
但愛月明月光照席涼於水帳裏燈花撒紅蕊好事  
從來不浪傳明日升堂報姑喜

妾薄命

妾薄命聽妾歌夫婿輕別離妾心當奈何山有虎豹水  
有蛟螭川塗邈悠曷云能來朔風吹衣雨雪霏霏洞房  
慄慄神悽色衰吁嗟乎妾顏雖改兮妾心不移

出雷港

江水碧如鏡晴空無垢氛青山遙隔浦白鳥自成羣花  
落春纜半潮平日欲曛歸期應不遠消息未相聞

韻次胡學士春日陪駕遊萬歲山

鳳輦宸遊日祥雲夾道紅香風傳別殿飛翠繞行宮徑  
轉千巖合波迴一鏡空忽看鸞鶴起聲在半天中

竹枝詞

船頭煙暝浪花飛船裏風來浪濕衣獨棹蘭橈下蓮渚  
迎郎不見又空歸

王翰檢

名儻字孟揚閩人永樂間  
官翰林檢討有虛舟集

感寓三首

羸皇越威武漢帝非仙才玄闕祕靈府何處求蓬萊終  
遺鎬池壁空獻新垣杯但見金泉下寶衣變寒灰  
艷色不足貴所貴在適時昭君傾國容遂爲丹青欺蛾  
眉嫁驕虜一往不可追至今青塚月夜夜令人悲  
富貴千里合貧賤促膝離骨肉尚云爾何況他人爲不  
覩寶門士請看蘭庭蒸餼履翟公何爲者謝客無乃遲

詠史

狐白僅一腋勝彼千牟皮壯士出片言萬諾空奚爲毛  
生奉平原自脫囊中錐提携十九人咤彼猶嬰兒一語  
定縱盟不待日晏時英風被廣座磊落誠可奇知人豈

不難長鈇聲同悲

水亭夜懷黃八粲林六敏

孤亭水雲深入境自幽絕七絃罷鳴彈桐陰初上月偶  
酌尊中醪高卧望雲闕荷露清角巾松飈濯毛髮寥寥  
天籟寒吟詠了未輟志偕南阜隱興藉東山發同心念  
離居中夜思超忽

入西山訪張隱士

西崖噴飛瀑結屋煙霞裏山人不冠屨客至同隱几獨  
鶴海上歸孤雲澗中起淨掃白石牀風來墮松子

送陳貢士

陳生江海士，跋履當豪門。五侯少知己，已倚劍思平原。海國一相訪，別余歸故園。杯銜霜夜月，袂拂秋山雲。四望大野空，蕭蕭鳴鴈羣。意氣但自許，離懷何足論。

### 寶山蘭石

山門隱松桂花雨，浮半空。金仙青蓮居，乃在煙霞中。石竹覆紫苔，四壁泉濛濛。因窺一燈影，宴坐萬劫同。衆籟清梵音，浮塵愧微踪。願言別苦海，永矣投禪宮。

### 小垂手

秦女騁妖嬈，春風步翠翹。只疑花作臉，更訝柳爲腰。燭暗花鈿墮，風輕羅帶飄。自矜纖弱態，不羨掌中嬌。

### 白雲寺贈僧

道院說梵處，應在白雲邊。燕坐度小劫，冥觀入大千。諸天花雨遍，雙樹慧燈懸。何日東林社，相期種白蓮。

### 送李校尉致仕還江左

雄劍委龍鳴，關河白髮生。功成百戰後，老去一身輕。夜月桓伊笛，秋風驃騎營。燕歌何處寫，曲罷有餘情。

### 送人之毘陵

興盡一杯酒，相看欲別時。孤帆乘吹發，一鴈度江遲。千古蘭陵令，秋風季子祠。勝遊多感慨，爲爾寄遐思。

### 舟中贈司馬秀才

才子茂陵客何年賦遠遊家藏封禪草身著鷓鴣裘未  
贈王祥劍先同部泰舟明朝霄漢上一鷓看橫秋

賦得花影

欲拂更紛紛空香寂不聞亂迷芳蝶夢輕護錦苔紋襯  
月籠書幌因風颺舞裙莫移庭下步蹴碎一階雲

送沙子進赴祿州別駕

客舍酒初香都門柳色黃一官仍別駕萬里赴炎荒江  
路猿聲蚤山城榕葉涼遠人勞撫字且勿厭殊方

短歌行

東風吹花墮錦筵綠楊半鞦韆青樓煙主人自爲鷓鴣舞

小妓更奏鴛鴦絃當杯入手君不醉落日已在西山顛  
短歌一曲心茫然請看明鏡高臺上何須白髮悲芳年

飲牛潭

洗耳在潭下飲牛在潭上白鷺飛復來煙中立相向

送夏廷簡怡山蘭石

別路繞珠林秋來落葉深一燈今夜雨千里故人心已  
覺空門幻還驚旅况侵坐聞鐘鼓曙離思轉沈沈

怨歌行

絃奏鈞天素娥之寶瑟酒斟流霞碧海之瓊杯宿君七  
寶流蘇之錦帳坐我九成白玉之仙臺臺高帳煖春寒

薄金縷輕身掌中托結成比翼天上期不羨連枝世間  
樂歲歲年年樂未涯雅玄粉白澹相宜卷衣羞比秦王  
女抱衾誰賦宵征詩參差雙鳳裁筠管不謂年華有凋  
換楚園未泣章華魚漢宮忍聽長門鴈長門蕭條秋影  
稀粉屏珠綴流螢飛苔生舞席塵蒙鏡空傍閒堦尋履  
綦宛宛青陽日將莫惆悵君恩棄中路妾心如月君不  
知斜倚雲和雙淚垂

長歌行

有淚莫泣鮫人珠有足莫獻荆山玉赤心徒使按劍猜  
至寶翻令笑魚目千金蹈海稱達人五噫出關西去秦

負芻不復遇知己空歌白石南山春楚卿棄相復何有  
於陵甘作灌園叟雜縣偶集魯東門惆悵胡能事杯酒  
長風蕭騷百草殘長鋏悲歌滄沱瀾金臺駿骨人已化  
瑤水風波不可攀畏途羊腸能折軸緘書爲謝雲間鵠  
海上三花久負期醉歸謗託平原宿

王學士

名達字達善號耐軒無錫人永樂中官侍讀學士有天游集

精衛操

按述異記炎帝女溺死東海化爲精衛日銜西山木石以填東海怨其溺死也

海之水兮靡可量余之怨兮旣綿且長志殊苦兮力日  
傷西山木石有時盡海不枯兮愁不忘

前旌操

衛宣公納伋之妻是爲宣姜生朔公令伋之齊使賊先待於隘而殺之壽知之以告

及及曰君命也不可逃壽竊其節而先往賊殺之及至曰君命殺我壽有何罪賊又殺之

飛旌兮影單白刃兮光寒兄之去兮路湯湯弟之心兮

悲且酸天昭昭兮理實難兄生弟死兮心何安

後旌操前旌操昔人有之而無後旌故用補焉

血湔湔兮載途嗟吾弟兮何辜弟之死兮實為吾吾不死兮心愧諸失親所愛兮兒罪當誅

梁溪

微波皺綠迴輕風溪流直與南湖通人家兩岸幾興廢  
鷗影蕭蕭夕照中孤橈欲發臨溪口澹煙寂歷明疎柳  
水清月落正愁人鐘鳴况是僧歸後芙蓉隔溪十里多

白雲滿牕生薜蘿櫓聲咿軋剪寒月去去其如離思何

送友從軍

煙浦綠迢迢離人酒易消路分京口樹帆渡月中潮夜  
靜聞清柝風寒試黑貂漢家方討虜好事霍嫖姚

題子昂畫

闕下歸來覓釣舟黃金帶重雪盈頭鯉魚風起芙蓉落  
一縷絲懸玉鏡秋

劉孟熙名績字孟熙號西江會稽人

送王內敬成遼水

應誇萬人敵耻作一書生塞月隨弓滿胡霜拂劍清馬



嘶秋草闊鷓沒暮雲平蚤逐征遼將飛車奏罷兵  
送魏仲房往上高省親

新年思定省理權別家林野雪消不盡春江流正深伯  
魚方學禮子賤只彈琴記取臨岐處清言抵贈金

送友人歸鄱陽

芳草綠尚淺故園春未殘平生爲客慣今日別君難短  
棹吳郎曲哀絃楚女彈江花正滿眼且莫下長干

大堤曲

春風起大堤歷亂樓前柳樓頭多女兒解勸襄陽酒襄  
陽估客足黃金百千爭買女兒心茱萸帳薄燈光透翡

翠衾重蘭氣深蘭氣未銷鐙未滅合歡交綰丁香結良  
宵一刻惜如金黃金易擲情難歇前船南商去後船北  
商來不知妝鏡匣今夕爲誰開

題宋院人畫盤車圖

大車盤盤牽不住小車碌碌推還去上阪下阪日千迴  
不離太行山側路吳鹽蜀米塞蒲箱烏犍耳濕筋力强  
商人重貨不畏虎飯牛夜夜宿車傍妻孥不須念行旅  
橐中有金皆樂土星飡露櫛逐隊行但願利多無所苦  
道傍往來多折軸誰人肯戒前車覆

詠箏鴈

絃絃相近不相離入調頻將玉手移最恨曲終人散後  
影分行斷各參差

浦舍人

名源字長源號東海無錫人洪武中官晉府引禮舍人有長源集

題青山白雲圖

青山欲轉綠溪迴古木春雲掩復開不識桃源在何處  
但看流水落花來

送王濟民歸盤谷

官亭酒香柳花白下馬持觴送行客客歸江上愁更多  
春水雨中生綠波青山遙對揚子渡殘日微明廣陵樹  
渡江酒醒傷別離夜半舟人歌竹枝烏啼月落海天遠

驛程已過淮陰縣楚鄉菰飯食有魚宵征在鞍宿在車  
中原漸近太行麓不知何處通盤谷一逕縈紆萬壑深  
始知舊宅隱雲林昔年泉谷渾無恙猿鶴猶存松桂長  
遺老家家懷故情相邀雞黍話平生尊前不問宦遊好  
只說山中農事蚤數畝何須負郭田郡中太守正求賢  
知君不肯入城市日逐漁樵向山水江南故人那可逢  
有書應寄南飛鴻

送人之荆門

長江風颺布帆輕西入荆門感客情三國已亡遺舊壘  
幾家猶在住荒城雲邊路遠巴山色樹裏河流漢水聲

若過旗亭多取醉不須弔古謬題名

寄袁二

長安年少羽林郎騎射唯能事武皇  
弓影醉開孤月滿刀頭新買百金裝  
聽雞曉闕踈星白走馬春郊細柳黃  
應募玉門關外去請纓生繫左賢王

王舍人

名綬字孟端自號友石無錫人永樂間官中書舍人

送楊得昂

我適桑乾歸君猶五溪去飄流若萍梗  
何由復相遇迢迢江上山歷歷煙中樹  
後夜月明時相思渺何處

寫竹寄贈顧教授祿謹中

秋聲起巫峽暝色迷湘渚悵望千里遙  
佳人渺何許幽期邈難值欲往復延佇  
中夜獨遐思西牕颯風雨

題青山白雲圖

我曾九龍山下住結廬正在雲深處  
日日看山還看雲長教剪却當簷樹  
無端一別猿鶴羣馬蹄南北徒紛紜  
塵途底事拂衣晚回首愧負山中雲

送張知縣

作宰麻陽去民風雜五溪世傳槃瓠後  
地接夜郎西臘釀多藤酒春禽半竹雞  
到官應有便莫惜寄緘題

送陳尚賓還靖州

嗟余湖海度年華爾復飄零更可嗟舊業斲歸翻似客  
異鄉重到卽爲家江連雲夢孤帆遠日落衡湘斷鴈斜  
後夜月明何處泊相思回首各天涯

王翰籍

名恭字安仲號皆山閩中新寧人永樂中被薦內閣纂修有白雲樵唱集

塞下曲

玉作寶佳

百戰臯蘭北長驅入塞垣陰雲橫虜陣朔雪度營門牧  
馬邊塵黑鳴笳隴日昏辛勤看玉劍猶未荅君恩

夏夜曲

初月照迴廊鳴璫出洞房竹清殘暑氣荷汎小池香雪  
腕宮羅潤雲鬟夜月涼庭前有梧葉蚤晚落銀牀

宮人入道

雨露恩寧薄煙霞思獨迷向人披鶴氅無分捲龍衣女  
伴愁將別君王夢亦稀他年青鳥使銜表到金扉

昭君怨

掩淚向邊州君恩此日休身隨胡地遠心是漢宮愁鴈  
塞春難度龍堆草易秋玉容何足貴翻作羽林羞

寒村訪隱者

谷口微霜度寒村獨見君西風正瀟索落葉不堪聞古  
路無行客閒門有白雲爲憐幽處好不忍便離羣

賦得白鴈送人之金陵

八國雅卷三  
十九  
之  
燕山榆葉望秋稀  
雪羽蕭蕭向楚微  
雨夜蘆花看不定  
夕陽楓樹見初飛  
影隨漢騎營邊落  
夢遶胡兒笛裏歸  
君到石城霜漸冷  
暮雲聲斷欲沾衣

新燕

海燕雙飛下柳塘  
主家臺榭已荒涼  
玉窻繡戶春雲外  
不忍翻飛過別墻

鷓鴣

綠樹殘春外  
雙飛錦翼齊  
長沙有遷客  
莫向雨中啼  
長信宮落花

深宮花謝使人愁  
片片隨風滿御溝  
妾命自憐花共薄  
君恩那似水東流

老馬

百戰沙場老  
此身長楸宮  
草幾回春  
只今棄擲寒郊路  
猶自悲鳴戀主人

山窻夜雨

深澗垂蘿暗竹房  
半枝殘燭雨聲涼  
蕭條樹葉千峰裏  
不獨啼猿斷客腸

詠白頭公鳥

竹下棠梨花漸稀  
白頭相對語依依  
五陵年少多金彈  
莫戀殘春忘卻飛

題梨花斑鳩圖

繡頸爛斑錦翼齊  
梁園春樹好栖遲  
樂遊年少偏嫌雨  
莫向花間自在啼

李方伯

名禎字昌祺廬陵人永樂間官河南左方伯

送友人南歸

離絃無楚調  
忍向醉時聞  
連歲長爲客  
他鄉更別君  
鷗波明夕照  
鴈字寫秋雲  
迢遞還鄉夢  
相隨過海門

周原幽居

山色蛾眉秀  
江流燕尾分  
亂蟬吟落日  
獨鶴引歸雲  
黃葉溪邊樹  
青帘雨外村  
興來留客坐  
隨意倒芳尊

送周秀才遊長沙

迢遞長沙道  
蕭條歲晏遊  
亂山黃葉寺  
孤棹白蘋洲  
夕鳥衝船過  
寒波背郭流  
毋論卑暑地  
賈傳昔曾留

宿廢普濟寺

青山行欲盡  
深樹見僧房  
雲氣千峯暝  
秋聲一院涼  
長藤懸破衲  
脫葉覆空廊  
龍象黃金地  
蕭蕭蔓草長

送陳生歸吉水赤岸

清砧無落葉  
總是別離情  
去路千程遠  
歸舟一葉輕  
秋雲連樹暗  
寒日映川明  
亦有滄浪興  
何時共濯纓

喜張進士叔豫見宿旅舍

于肅愍  
窮巷寂無隣青燈共故人遠聲霜下磬孤影客邊身露  
冷蛩相弔庭寒月自親殷勤一瓢酒更與話酸辛

春日山中尋泉

春泉試獨尋度壑復穿林忽見流紅遠方知入翠深  
色渾因悟雨聲澹只疑琴盥弄忘歸去窮源空有心

于肅愍

名謙字廷益號節菴浙江錢塘人宣  
天間官少保兵部尚書贈太傅并諡

南國有佳人

南國有佳人皎皎冰雪姿恒恐汗潔白臙粉不敢施奉  
身事君子服勤忘燕私一朝成遠別千里長相思願托  
雙飛翼辛苦良不辭歸來侍君側恩義兩無虧永言執

箕帚盡瘁以爲期可望不可卽翹首空嗟咨

楊花曲

垂楊飛白花飄飄萬里去多情蜂蝶亂追隨不問依棲  
向何處人生漂泊無定蹤一似楊花趁暖風今朝馬足  
西邊去明日車輪又向東可憐不識歸來路一去江山  
千萬重楊花本是無情物懊惱人生在客中

出塞

健兒馬上吹胡笳旌旗五色如雲霞紫髯將軍挂金印  
意氣平吞瓦剌家瓦剌窮胡真犬豕敢向邊疆撓赤子  
狼貪鼠竊去復來不解偷生求速死將軍出塞整戎行

八國雅卷三  
二十  
十萬戈矛映雪霜左將纔看收部落前軍又報縛戎王  
羽書捷奏上神州喜動天顏寵數優不願千金萬戶侯  
凱歌但願蚤回頭

落花吟二首

昨日花開樹頭紅今日花落樹頭空  
花開花落尋常事未必皆因一夜風  
人生行樂須少年老去看花亦可憐  
典衣沽酒花前飲醉掃落花鋪地眠  
風吹花落依芳草翠點胭脂顏色好  
韶光有限蝶空忙歲月無情人自老  
眼看春盡爲花愁可惜朱顏變白頭  
莫遣花飛江上去殘紅易逐水東流

東風吹落花點點依芳草多情還似未開時  
分付家僮莫輕掃掃却明朝又落來  
來年依舊見花開莫因開落分憂喜  
且向花前飲一杯

古意

妾顏如花命如葉嫁得良人傷遠別  
別來獨自守空閨夜夜焚香拜明月  
月缺重圓會有期人生何得久別離  
願將身托蟾蜍影照見良人不寐時

夏夜步月

明月入我戶清風吹我衣散步下瑤階  
仰看星斗暉萬籟寂不聞羣動咸  
息機嘯歌振林藪鳥雀爭分飛興盡



却歸來此意知者稀

夜聞鶴唳有感

齋居無四隣庭空篆煙冷明月揚素輝脩篁散疎影雙  
鶴向我鳴鼓翅復引領靈風振縞衣華露浥丹頂清響  
徹雲霄萬籟悉以屏芝田在何許遙遙隔塵境欲去還  
未能蹉跎駐光景聽此融心神令人發深省

暮春行

花外東風捲塵土紅雪隨風撩亂舞看來春去本無情  
撫景傷心良獨苦人生安得常少年花開花謝兩堪憐  
今日花開顏色好明日花殘春已老白頭未得返丘園  
空向天南憶芳草憶芳草岐路多江湖浩蕩浮春波春  
波只解東風去不送歸舟可柰何

題山行小畫

青山無數重掩映門前樹飛鳥伴孤雲時時自來去  
近林下人相看久延佇

題山中日暮

落日照樹梢飛鳥投林稀郊園迷遠近溪山帶餘輝  
鐘何處發雲外一僧歸

到澤州

信馬天將暮離山路轉平川縈太行驛樹繞澤州城落

日翻旗影長風送角聲孤雲在天際回首若爲情

題古寺

古寺知何代荒涼倚翠微凝塵生佛面落葉擁禪扉殿  
迴香燈寂廊空鳥鵲飛塔鈴風外語應似怨斜暉

送平江侯出鎮臨清

設笳載道出神州鐵騎連雲擁列侯綵旆行穿花外路  
紫騮嘶近驛邊樓寸心深慰黎民望一而全分聖主  
憂千里桑麻齊魯地呻吟從此變歌謳

春日登樓

柳條如翠線萬縷識春愁遮斷東風路無緣入畫樓

秋閨二首

散步瑤階下庭空不見人回頭顧明月惟有影隨身  
莫向池邊去芙蓉花正開近來憔悴甚因是被風猜

張學憲

名和字節之號篠菴崑山人正統間官  
浙江廉憲兼督學政有篠菴先生集

期友人金河橋上納涼不遇

涼月鑑廣津微風集高樹翻翻栖鳥驚杳杳流螢度蕭  
條旅中懷悵望橋東路有約君不來無言獨歸去

登泰山

昔聞泰山高今上拱北臺剛焱振六合曠望無塵埃日  
觀一峯立天門兩崖開瀑流注空谷響轉萬壑雷似聆

笙鶴音縹緲雲中來羽節分上下長煙共徘徊  
難接自愧非仙材

夜宴曲

余應江西校文聘至蘇適會錢內翰劉沈盛陳諸子飲徐汝節所酣有述景泰元年

銅盤絳蠟流晴虹蜀絲步障圍香風瑤釵寶髻光玲瓏  
紅牙按腔白苧舞仙袂翩翩欲輕舉驚鴻翻雲雛鳳語  
水晶簾箔搖寒星金鴨腦麝流芳馨蘭芽玉茁春娉婷  
鈿簧悠悠歌宛宛鯨吸流霞恨杯淺曲闌露寒斜月轉  
送劉文羽赴京  
臨岐一杯酒爲君歌遠遊人生若流萍聚散焉能謀落  
日照大江長風吹去舟江花與江水離恨同悠悠

儀真別越客

落日照芳草長風吹斷雲滄洲送歸客遠道惜離羣  
酒何年共江帆此路分蓬間獨回首鳴鴈不堪聞

題江湖勝覽卷贈李彥暉

萬里一孤舟常年事勝遊星河三峽夜煙樹五湖秋跡  
擬玄真子名齊博望侯翻憐蓬華士白首卧林丘

蘭陵秋夕

碧樹鳴秋葉芳塘斂夕波漏長稀箭刻樓迥逼星河  
候鴈迎霜蚤啼蜚傍月多懷人不能寐彈鋏起商歌

過桐君山

雲斷山疑合川回路忽分秋聲兩岸葉曉色萬峰雲旅  
鴈衝帆度寒蟬隔水聞嚴陵遺跡在我欲問桐君

聞繼耕兄有病作

南北事驅馳頻年在別離兩鄉空積夢雙鬢各成絲海  
路瞻雲斷音書附鴈遲急難心耿耿愁賦鶴鴿詩

送行人劉諭使滿刺加

華髮漸盈頭誰憐萬里遊佩辭天闕曉帆挂海門秋積  
水浮仙嶼寒星伴使舟歸來建奇策博望擬封侯

度嶺

疊磴盤盤上溪流曲曲通馬嘶青嶂外人度碧霄中怪

石奔狂獸飛梁卧斷虹驅馳奉

明詔焉敢惜微躬

雙溪晚行

落日雙溪暝南風一舸輕水螢飛不定沙鳥宿還驚捲  
幔灘聲遠披襟露氣清千峰互迴合何處望 神京

遊方山

目覩山中勝神遊物外天一塵飛不到千嶂迴相連磴  
道盤危壁禪宮近瀑泉馬嘶紅樹裏人度白雲邊洞穴  
龍吟水香臺鶴舞煙竹深纔辨路松偃不知年閩苑飈  
難馭滄溟石可鞭經過暫成趣何必問神仙

泰山絕頂作

國朝卷三  
二十七  
俯視羣山小方知岱嶽尊峯高礙星斗勢遠壓乾坤疊  
嶂紛開闔浮嵐互吐吞彤霞橫御帳碧落近天門絕壁  
唐銘在穹碑漢刻昏石屏當道擁雷瀑下雲翻禋祀時  
方啓明堂跡尚存登封七十二我欲問軒轅

擬劉長卿過賈諒宅和友人韻

少年流落到湘濱當世何人更惜君身類楚囚非達宦  
書陳漢室祇遺文空林落葉分秋靄廢井寒蕪映夕曛  
又弔忠魂無覓處嶺猿回首不堪聞

賦得柳送人

暖風披拂暫葳蕤色也鵝黃淡落暉煬帝宮前春漠漠

闔閭城外晚依依青驄每縮長條繫紫燕遙衝落絮飛  
有客河橋欲分袂一枝相贈惜相違

與朱千戶夜話

客裏相逢感慨深劍歌時復動悲吟清尊坐對三更月  
紫塞遙馳萬里心瀚海地荒龍駕遠交河風急鴈書沈  
微臣愧乏安邊策北望胡天淚滿襟

南山清隱爲宣城湛銓作

遁跡甘從鹿豕羣南山深處隔囂氛屋前流水連青嶂  
堦下寒松護白雲栗里自翦元亮酒草堂不辱穉珪文  
紛紛車馬塵中客高節能無愧隱君

蚤朝

白玉欄杆近綺疏  
絳羅宮燭映金鋪  
仙韶未作班初定  
試聽雞人第一呼

張僉都

名楷字式之四明人  
求天間官僉都御史

遊少林寺

步入金沙地相邀坐竹林  
僧歸青嶂寂龍卧碧潭深  
石澗流春乳松堂落午陰  
高懷殊未已臨別更沈吟

賦得暮雨送李胄

微雨滄波路孤舟薄暮時  
鴈迷歸浦蚤雲濕渡江遲  
白日青山暝芳洲碧草滋  
紛紛對華髮相看總成絲

晚次樂鄉縣

故國一千里他鄉此獨征  
亂山依遠戍寒日下孤城  
燈火瞻程近川原入望平  
不堪回首處孤鴈入雲鳴

贈張將軍

百戰功何在荒城夕照間  
角聲千騎盡弓影一燈閒  
見月思臨塞因風想出山  
當年青海上猶記突圍還

送人遊塞

別淚墮如絲含情折柳枝  
晚風花落處寒日馬嘶時  
記里知前路占程定後期  
百年能幾日強半惜分離

李陵詠

李陵入匈奴自恃將家子眼空沙漠羣氣弱天下士轉  
戰駟懦兵貪功入深壘殺氣慘雲日笳鼓昏未已決死  
鋒鏑間失身腥穢裏堂堂漢將軍夫豈穹廬侍遠意欲  
有爲偷生以含耻對案不能食殊方忍居此霜寒胡鴈  
鳴雪凍白草死迢遙望妻孥滅沒誰與理

### 老將行

少事武皇親幸時天閑赤驃尋常騎當圍一箭落雙隼  
萬口嘖嘖稱男兒天山夜擣單于壘葱嶺朝傾頡利師  
琵琶帳底金鑿落刁斗營前缺蒺藜穰且豈解知合變  
孫武何曾識偶奇當時只擬名不朽誓向藁街懸賊首

相如白璧還奉君晉鄙兵符奪懸肘謗說三徵出草萊  
誰誇百步穿楊柳運籌不數張文成決計浪傳陳戶牖  
長笑廉頗惟善飯也知樊噲徒誇酒蹉跎世事若浮雲  
閩外傳宣寂不聞帳下爭趨新號令道傍誰識舊將軍  
對客龍鍾羞講武逢人磬折學談文壁上蠨蛸翳雙劍  
門前烏雀散三軍願得子房憐老馬還同魏尚叙前勛

### 隴頭吟

玉門將軍秦隴客十載不歸頭半白夜聞隴水憶秦關  
曉上城樓聽羌笛笛聲嗚咽送邊愁隴水滔滔日夜流  
壯士三千豪氣盡家人翹首望封侯年年虛建平胡策

依舊黃沙隴水頭

竹枝詞

浮雲日日蜀山頭石瀨年年蜀水流家住瞿塘三峽下  
慣經風浪不知愁

江南春

蒲川啼鳥怨殘紅水部春園柳絮風春雨一番江水闊  
草痕將綠到吳中

塞下曲

風急陣雲高胡人不敢逃當圍縛酋虜來試礮鞬刀

江南曲

忽得三巴信郎歸未有期只緣風浪險不是薄情兒

部忠武

名登字元登籍濠州廣德人永樂天  
順間封定襄伯成化中贈侯并諡

洞庭君廟

停舟一拜洞庭君古廟荒涼對夕曛鳥跡下庭書作字  
蝸前侵壁篆成文江通巴峽風濤壯山過寧陵楚蜀分  
簫鼓不來鴉陣散滿堦黃葉自紛紛

經舊戰場

一夜西風捲漢旌連營兵甲散如星孤臣獨抱終天痛  
諸將難逃誤國刑自恨中原無猛士誰知高廟有神靈  
黃河白骨斜陽裏衰草連天戰血腥



哀征人

天連離水鳴嗚咽戰馬無聲寶刀折冤鬼慘酸啼夜月  
青燐熒熒明又滅照見征夫戰時血

客中春晚

遠塞書難寄空庭花自開舊巢雙燕子今歲又歸來

偶州目

名桓字武孟太倉人永樂間官荊門州吏目

雜詩

衡茅日岑寂嘉樹生繁陰夙興挹朝爽翛然澄我心如  
彼倦飛鳥冀得栖故林抱經味遺言且復理鳴琴惜哉  
鍾子歿曠世誰知音

養疴卧丘樊庶得脫塵鞅三徑日就荒行樂倦還往荆  
榛旣蕃蕪余蓼亦滋長幽蘭獨憔悴况復纏草莽不因  
馨香發豈獲君子賞

歲暮

忽忽歲云暮朔風吹客衣雖云鄉井近轉覺信音稀山  
響鼙鼙嘯江空鶴鶴飛百年渾潦倒底事未能歸

送陳民初先生歸廣州兼問訊趙知事公傑

靜江遙帶五羊城官舸乘風畫鷁輕客館鄉人秋送別  
高齋弟子日相迎枕柳接葉蠻煙暗螺蚌含珠海月明  
到郡爲詢賢贊府幾時鞍馬定朝京

桑別駕

名悅字民懌號思玄居士太倉人宣德中官長沙倅改移柳州有思玄集

同丁秋官鳳儀夜坐

哦詩北斗下清夜殊未央長天振孤影一鴈東南翔我心如風露煩襟亦清涼况對秋月坐肌骨徹寒光夜氣如何駕同君游八荒

感懷

東園有奇花容姿鮮灼灼雖是春風開亦是春風落甘霖被郊原蔓草輕蘭葯所以高岡松無言樹寥廓

和朱文公讀道書二首

塵世難縱步眷焉思十洲躡履登碣石濯纓臨弱流

芳遺所思玉樹無春秋太虛一回首歲月空悠悠

崦嵫山萬仞日落風淒淒雲駟駕牽牛良夜同安期織女濯銀河顧盼生容姿相看不待語步月興遐思

招賢里

公卿薦士久不作此地舊有招賢名誰知燕臺一杯上可直全齊七十城魏闕遙遙楚天碧滿眼白雲江水急小山叢桂不聞歌秋空月冷黃金泣

贈蕭時清

十里螺湖如掌平開門正挹滄浪清偶逢道士贈丹訣閒課山童抄酒經晝長燕子飛入戶春盡樹陰鋪滿庭

國雅卷三  
近來聞說有奇事賣藥修琴曾到城

詠佛桑花

南無麗卉鬪猩紅淨土門傳到此中欲供如來嫵色重  
謂藏宣聖訝株同葉深似有慈雲擁藥折偏禁慧日烘  
賞玩何妨三宿戀只愁燒破大虛空

題畫

浮雲出沒吞遙岑小亭日日巢秋陰美人如玉不可見  
松子自落空山深

國雅卷之三

